

樹

藝

篇

草部第二

藍

茜

歲

紫草

紅藍

鼠尾草

蓋草

通草

燈心草

席草

水葱草

菅草

莞

藺

藍

爾雅曰葢馬藍注曰今大葉冬藍也廣志曰有木藍今世有菱赭藍也藍地欲得良三徧細耕三月中浸子令芽生乃畦種之治畦下水一同葵法藍三葉澆之晨夜再澆之蔣治令淨五月中新雨後即接濕耒耨拔栽之夏小正日五月洛萑藍蓼三莖作一科相去八寸栽時宜併工急手無令地燥也白背即急鋤栽時溉濕白背不急鋤則堅確也五徧為良七月中作坑令受百許束作麥稈泥泥之令深五寸以苦蔽四壁藍倒豎於坑中下水以木石鎮壓令沒熱時一宿冷時再宿漉去荻內汁於瓮中率十石瓮

着石灰一斗五升急手拌並彭反之一 頃止澄清瀉去水

別作小坑貯藍澱着坑中候如強粥還出瓮中盛之藍澱成矣種藍十畝敵穀田一頃能自染青者其利又倍矣崔寔曰榆莢落時可種藍五月可 藍六月可種冬藍冬藍

木藍也八月用染也齊民要術

正月中以布袋盛子浸之芽出撒地上用灰糞覆蓋待放葉澆水糞長二寸許分栽成行仍用水糞澆活至五六月烈日內將糞水潑葉上約五六次俟葉厚方割割離土三寸許將梗葉浸水缸內一晝夜濾淨每缸內用礬灰色清者灰八兩濃者九兩以木扒打轉澄清去水是謂頭靛其

在地舊根旁須去草淨澆灌一如前法待葉盛亦如前法
收割浸打謂之二靛又俟長亦復如前澆灌斫則齊根浸
打法亦同謂之三靛其濾出粗壅田亦可便民圖纂

藍出崇明葉如菘菜土人無不栽惟凍沙為盛四月下子
至五日剪其葉浸水三兩日漉去粗攪之成青靛已而復
生如是者歲常三四次出郡城者為杜藍姑蘇志

天藍苗若苜蓿三四月開碎黃花土人以其子播於大麥

地麥後則翻入於土最能肥田同上鄉草子即此也

黥三月宜下種比及種時先於年前八九月間耕地一遍
耙平臘月間復耕耙一遍臨種時又耕一次撒種後橫豎

復三四次生四五葉時即鉏後有草再鉏至五月間收

打黥農桑撮要

五月 黥夏至前後看葉上有皺文方可收割每五十斤用石灰一斤於大缸內水浸次日變黃色去梗用木耙打轉粉青色變過至紫花色然後去清水成黥種黥之方先於三月中具載同上

藍葉如水蓼陶隱居云即今染縹碧者亦名菰藍汁可作澱又有紅藍花亦名黃藍博物志謂張騫所致春苗夏花可染真紅毘陵志

馬藍田野人以為菜茹爾雅云葑馬藍草木略

爾雅曰葳馬藍染草也即今大葉冬藍為澱者是月令仲夏令民無艾藍以染鄭氏云為傷長氣然則艾藍於夏先王之法禁焉制字从藍此故也由是觀之先賢所云葳冰所以無霓而原蠶惡其害焉豈虛言也哉齊民要術以為種藍一同葵法藍三葉澆之蔕治令淨五月中新雨後即拔栽之故夏小正五月蓄蘭灌沐藍蓼灌澆灌也沐剥沐也詩曰終朝采綠不盈一掬終朝采藍不盈一擔藍綠易得之物今以憂思貳之故雖終朝采而綠不盈一掬藍不盈一擔也藍大於綠又其畦植如鱗則其採之盈襜易矣故詩以為後綠可以染黃藍可以染青則皆婦人致飾

之物荀子曰青出之藍而青於藍喻學則才過其本性漢紀曰欲以素絲之質附近朱藍亦明就士之多益脉要精微論曰赤欲如白裹朱不欲如赫青欲如蒼璧之澤不欲如藍齊民要術曰蓼中之虫豈知藍之甘乎人之域於一方何以異此埤雅

三月種藍將平地耕熟下種用鐵耙勻上用荻簾蓋之每日早用水洒至生苗去荻簾長至四寸高以熟肥地成畦打溝成行每五寸地栽一窠每日用水澆灌如地瘦則用薄糞水澆一二次至七月間收 每藍一擔用甜水一擔將葉根切細於鍋中同煮數百沸粗將汁盛鍋內至第二

日比熟藍三停內用生藍一停摘葉於磨盤上手揉三次
用熟汁澆柳濾粗令淨缸內盛之存藍根後開花結子至
八月收種來春三月種農桑撮要

藍染草也爾雅云葳馬藍藍有數種有木藍有松藍可以
為澱者有蓼藍但可染碧不堪作澱藍一本而有數色刮
行青綠雲碧青藍黃豈非青出於藍而青於藍者乎種藍
之法藍地欲良三徧細耕三月中浸子令芽生乃畦種之
治畦下水一同葵法藍三葉澆之晨夜再澆蔣治令淨五月中

新雨後即接濕耨耨拔之三莖作一科

栽時宜併工急手無令地燥也白

背即急鋤

栽時既濕白背不鋤則堅確也

五徧為良七月中作藍澱崔

寔曰榆莢落時可種藍五月可

藍六月可種冬藍

冬藍大藍

也藍非獨可染青絞汁飲之最能解魚為諸藥等毒不可

闕也 王氏農書

藍者染青之草荀子曰青出於藍而青於藍言染反勝於其質菰藍其汁抨為澱堪染青蓼藍苗似蓼而味不平不堪為澱雅作碧色爾崔寔曰榆莢落時可種藍五月可

藍故小雅曰終朝采藍不盈一擔五日為期六日不詹襜衣蔽膝也箋云期至五月歸今六月猶不至五月者正藍之候月令仲夏之月乃云令民毋 藍以染注云此月藍始可別引夏小正曰五月啓灌藍蓼灌謂叢生也種藍之

體初必叢生藍兒長大始可分移使之稀疏以言正養藍之時非藍之候也夫民之於利甚勤其於物也封植養長者惟恐不至苟藍於勢未當分移之候豈不知養之以待其成何待上之人肩肩出令而止之乎苟如是則蓼菜之行菜茹之畦在上者不勝禁矣夫藍之禁必於民有私利而於陰陽或國事有不便者故禁而止之蓋自四月微陰始起為政者繼長增高毋有壞墮此月又陰陽爭死生分之月君子戒靜以待宴陰之所成則微陰未成也蓋藍以損生氣恐微陰不勝故耶又是月班馬政游牝別郡繫駒之月馬之為性畏新出之灰駒遇者輒死石塘

之灰亦能令馬落駒 藍以染也燒灰也暴布也三者皆有出灰之氣令而禁之者蓋為馬歛藍於草中獨有禁故字從監漢楊震常種藍自業又趙岐道經陳留此境人皆以種藍染紺為業藍田彌望黍稷不植慨其遺本遂作賦一章 爾雅翼

藍澱葉大叢生莖短有節折其莖以土壅之蔡襄江南月錄云採以器盛水浸除滓梗攪之以灰即成諸縣皆有閩侯官長樂尤多一種葉如蓼而圓者曰藍蓼一種小葉者曰槐藍 八閩通志

藍數種摠謂之藍其大葉者別名馬藍釋草云歲馬藍部

氏曰今大葉冬藍也疏云今為澱者是也凡物大於其類者多以馬名之今人言亦然蓋諸藍之類菰藍惟堪染青蓼藍不堪為澱雅作碧色故以馬藍為作澱之藍崔寔曰榆莢落時可種藍五月可刈藍六月可種冬藍冬藍木藍也八月用染子虛賦曰其高燥則生葳薜苞荔薜沙青蘋歲馬藍也薜似燕麥苞薜也荔馬荔薜藟蒿沙鎬侯青蘋似莎而大凡此皆非佳草於用亦稀何足以侈雲夢蓋古之君子觀地之所產以知其土之美惡今高燥埤濕衆物居之則地之美富可知故自馬藍以下皆載之也本草唐本注云藍圓徑二寸許厚三四分出嶺南云療毒腫太常

名此草為木藍子 尔雅翼

園經曰藍實生河內平澤今處：有之人家蔬園中作畦種蒔三月四月生苗高三二尺許葉似水蓼花紅白色實亦如蓼子而大黑色五月六月採實按藍有數種有木藍出嶺南可入藥有菰藍可以為澱者亦名馬藍尔雅所謂葑馬藍是也有蓼藍但可染碧而不堪作澱即醫方所用者也又福州有一種馬藍四時俱有葉類苦益菜土人連根採之焙搗下從酒服錢匕治婦人敗血甚佳又江戶有一種吳藍二三月內生如蒿狀葉青花白性寒去熱毒止吐血此二種雖不類而俱有藍名又古方多用吳藍者

或恐是此故并附之後漢趙岐作藍賦其序云余就醫偃
師道經陳畱此境人皆以種藍染紺為業藍田弥望黍稷
不殖至今近京種藍時盛云藍汁治蟲豕傷咬刘禹錫傳
信方著其法云取大藍汁一碗入雄黃麝香二物隨意着
多少細研投藍汁中以點咬處若者毒即並細服其汁神
異之極也昔張薦員外在劔南為張延賞判官忽被班蜘蛛
咬項上一宿咬處有二道赤色細如著繞項上從背前
下至心經兩宿頭面腫疼如數升益大肚漸腫幾至不救
張相素重薦因出家財五百千并薦家財又數百千募能
療者忽一人應召云可治張相初甚不信欲驗其方遂令

目前合藥其人云不惜方當療人性命耳遂取大藍汁一
甕盛取蜘蛛投之藍汁良久方出得汁中甚困不能動又
別搗藍汁加麝香末更取蜘蛛投之至汁而死又更取藍
汁麝香復加雄黃和之更取一蜘蛛投汁中隨化為水張
相及諸人甚異之遂令點於咬處兩日內悉平愈但咬處
作小瘡痂落如舊

衍義曰藍實即大藍實也謂之蓼藍非是爾雅所說是解
諸藥等毒不可闕也實與葉兩用注不解實只解藍葉為
未盡經所說盡矣藍一本而有數色刮竹青綠云碧青藍
黃豈非青出於藍而青於藍者也生葉汁解藥毒此即大

藍又非蓼藍也蓼藍即堪搽汁染翠碧花成長穗細小淺紅色

青澱以藍為之所以染青也藍有二馬藍葉大槐藍葉細皆可為澱蔡端明江南月錄云採以般盛水浸滓梗以灰攪之即成澱

漳州府志

藍有三種蓼藍如蓼染綠大藍如芥染碧槐藍如槐染青三藍皆可作澱色成勝母故曰青出於藍而青於藍

木

藍即馬藍爾雅曰歲出青龍南北刈其葉漚為澱可以染青俗謂青袂歲凡三四刈別種出崇明如蒿而紅發甚早作澱且多一刈便了謂之斲青

松江府志

尔雅歲馬藍註今大葉冬藍也疏歲一名馬藍今為澱者
是也

茜

如蘆染絳之物葉似束葉頭尖下闊莖葉俱澁四五葉對生節間蔓延草木上根紫赤色今所在有八月採根說文曰人血所生故一名地血今如蘆能治血又所染亦赤蓋其類耳齊人謂之蓐或作茜漢書千畝卮茜是也今人染蓐者乃假蘇方木非古所用尔雅翼

尔雅曰如蘆茅蒐蓋如蘆一名茅蒐其葉似棘可以染絳說文曰人血所生如蒐從草從鬼齊人謂之茜陶隱居以為東方諸處乃有而少不如西多夫文西草為茜其或以此詩曰東門之墀如蘆在坂又曰縞衣如蘆聊可與娛如

蘆茅蒐之染女服也周官庶氏掌除蠱毒以嘉草攻之嘉
草若茜之類是也傳曰千畝危茜千畦薑韭其人皆与千
戶侯等然則施蒞之利博矣此小人之所以孝圃也埤雅
圖經曰茜根一作猜生喬山々谷今近处皆有之染緋草
也許慎說文解字以為人血所生葉似東葉而頭尖下闊
三五對生節間其苗蔓延草木上根紫色陸机草木疏云
如蘆茅蒐猜草也齊人謂之茜徐州人謂之牛蔓二月三
月採根暴乾今圃人或作畦種蒔故貨殖傳人危茜千石
亦比千乘之家言地利之厚也醫家用治蠱毒尤勝周礼
庶氏掌除蠱毒以嘉草攻之于室以嘉草為蓑荷陳藏器

以為蓑荷与茜主蠶之最也

茜草長莖圓葉随处有之可入藥治婦人男子血症好事者取之染外送人鮮紅可愛厓山志

茜亦作蒨可以染緋故曰地血亦曰如蒨曰茅蒐齊人謂之蒨徐人謂之牛蔓詩所謂如蒨在坂尔雅所謂如蒨茅蒐莖葉麓澁而根紅故許慎謂人血所生周礼庶氏掌除蠱毒以嘉草攻之陳藏器以蓑荷与茜為嘉草草木畧

尔雅曰如蒨茅蒐註今之蒨也可以染絳注今染絳蒨也一名如蒨一名茅蒐詩鄭風云如蒨在坂陸机云一名地血齊人謂之茜徐州人謂之牛蔓即今之蒨草是也

歲

馬藍葉如苦益菜即尔雅所謂歲馬藍是也土人多採以

治鯢魚毒

八閩鯢即河豚

苦歲一名苦織子有裏形如皮弁始生青熟則赤裏有實
正圓如珠亦隨裏青赤長安兒童謂為洛神珠一曰王母
珠一曰皮弁草古今注

薯即

薯即出山中其樹藤生其根頭如芋四五相連紫黑色土人染深青布帛既成復熬其根取紅汁加於青上以助其色莆人謂之薯蓣又一種俗呼馬甲變亦出山中藤生有刺葉圓稍長厚硬而文深莖赤色子十數枚作一苒大如甜藷而圓生青熟紅其根功用與薯即同莆人呼為埔血

邵武府志

薯蓣彭志作薯即出山中其樹藤生其根頭如芋四五相

連舟持爛作蓣用以染衣及網謂耐雨衣

興化府志
漳州志同

薯榔莖蔓似薯根似何首烏色黑肉紅可染出泉州

八閩
通志

紫草

爾雅曰藐苾草也一名紫炭草廣志曰隴西紫草染紫之上者本草經曰一名紫丹博物志曰平氏山之陽紫草特好也黃白軟良之地青沙地亦善開荒黍稷下大佳惟不耐水必須高田秋耕地至春又轉耕之三月種之耨耩地逐壟手下子良田一畝用子二升薄田用子三升下訖勞之鋤如穀法唯淨唯佳其壟底草則拔之壟底用鋤則傷紫草九月中子熟刈之候穉芳蒲茂燥載聚打取子濕戴子則鬱泥即深細耕不細不深則失草矣尋壟以耙耨取整理收草宜併手力速竟為良遭雨則損草也一拖隨以茅

結之擘葛弥善四托為一頭當日則斬脊顛倒十重許為
長行置堅平之地以板石鎮之令扁濕鎮直而長燥鎮則
碎折不鎮賣難售也兩三宿豎頭着日中曝之令浥然
不晒則黝黑太燥則碎折五十頭作一洪十字大頭向
外以葛纏絡着敞屋下陰涼處棚棧上其棚下勿使驢馬
糞及人溺又忌煙皆令草失色其利勝藍若欲久停者入
五月內着屋中閉戶塞向密泥勿使風入漏氣過立秋然
後開出草色不異若經夏在棚棧上草便變黑不復任用

芥民要術

尔雅曰藐苽草註可以染紫一名苽蒺蒺云疏藐一名

莛草根可染紫之草本草一名紫丹唐本注云苗似蘭香
莖赤節青花紫白色而實白也

三月內種宜軟沙地耨耕勻細逐壟手下子良田一畝用
子二升半薄田用子三升壟底有草則用手拔去用鋤則
傷其根不茂盛此嬌嫩之物農桑撮要

六月收紫草用火燒其根陰根用草包收掛之則葉不落
同上

九月刈紫草子熟即刈之曬乾打子濕則浥把耨要整理
同上

收草宜速遇雨則損每一小束茅草束之當日斬齊一顏

一倒十層堆塚平地上以格石壓令區於屋下陰涼處棚上頓勿令煙燠同上

紫草尔雅謂之藐廣雅謂之茈蒺苗似蘭香節青種紫草宜黃白軟良之地青沙地亦善開荒黍稷下大佳性不耐水必須高田秋耕地至春又轉耕之三月種之耨耩地逐隴手下子良田一畝用子三升下訖勞之鋤之穀法潔淨為佳其隴底草則拔之隴底用鋤九月中子熟刈之揅蒲切燥載聚打取子濕栽子即深細耕則不細不深尋壅以耙耨取整理取草宜連草也一拖隨以茅結之擊善四拖為一頭當日則斬齊顛倒十重許為長行置堅平之地

以板石鎮之令

濕鎮直而長燥鎮則碎折不鎮賣難售也

兩三宿堅頭着日

中曝之令

然大燥則碎折

黑

五十頭作一洪

洪十字大

葛纏

着廠屋下陰涼處棚棧上其棚下勿使驢馬糞及人

溺又忌烟皆令草失色其利勝藍若欲久停者入五月內

着屋中閉門塞向密泥勿使風入漏氣過立秋然後開出

草色不異若經夏在棚棧上草便變黑不復任用種訖施

瓶擺之或以輕鈍碾過秋深子熟傍去其土連根取出就

地鋪排頗乾輕振其土以茅策束切去虛梢以之染紫其

色殊美

王氏農書

尔雅藐苳注云可以染紫一名苳羗八月末種二月採根

用密籠藏之見海風則黑爛 八閩通志

釋草云藐苾草郭氏曰可以染紫一名苾蒻說文亦曰苾
藐紫草盖苾即紫也以其可染紫故名苾上林賦有苾蒻
司馬彪亦云紫色之薑則苾之与紫古字通尔列仙傳商
客能致紫草膏与染家本草說云其利勝藍按種藍一畝
已敵穀田一頃矣而此復勝焉有以見後世末作之盛夫
紫間色奪朱者也 尔雅翼

圖經曰紫草生碣山、谷及楚地今處、有之人家園圃
中或種時其根所以染紫也尔雅謂之藐廣雅謂之苾蒻
苗似蘭香莖赤節青二月有花紫白色秋實白三月採根

陰乾故方稀見使今醫家多用治傷寒時疾發瘡癰不出者以此作藥使其發出常宙獨行方治豌豆瘡煮紫草湯飲後人相承用之其效尤速

紫草尔雅謂之藐廣雅謂之茈蒺本草云生楚地三月採根陰乾徭人以杜前者為佳名雅啣草溪蠻叢笑

藐紫草也今但知藐然之藐丹鉛摭錄

紅藍

花地欲得良熟二月末三月初種也種法欲雨後連下或漫散種或耨下一如種麻法亦有鋤耨而耨種者子科大而易料理花出款日：乘涼摘取不摘則乾摘必須盡餘留即合五月子熟拔曝令乾打取之子亦不用醬浥五月種晚花春初即留子入五月便種若待新花熟後取子則大晚矣七月中摘深色鮮明耐久不黯勝春種者負郭良田種頃者歲收絹三百疋一頃收子二百斛与麻子同價既任車脂亦堪為燭即是直頭成米二百石米已當穀田三百疋絹超然在外一頃花日須百人摘以一家手力十

木克一但駕車地頭每旦當有小兒僮女十百餘群自束
分摘正須平量中半分取是以單夫隻妻亦得多種晒花
法摘取即確搥使熟以水淘布袋絞去黃汁更搥以粟飯
漿清而醋者淘之又以布袋絞去汁即收取染紅勿弃也
絞訖著瓮器中以布蓋上鷄鳴更搥令均於席上攤而曝
乾勝作餅作餅者不得乾令花浥鬱也作臘脂法預燒落
藜：藿及蒿作灰無者即草灰亦得以湯淋取清汁物汁
純厚太醲即絞花不中用唯可洗衣取第三度淋者以用
揉花和使好色也揉花十許遍勢尽乃止布袋絞取汁着
瓮挽中取醋石榴兩三箇擘取子搥破少着粟飯漿水極

酸者和之布絞取瀋以和花汁若無石榴者以好醋和飯漿亦得用若復無醋者清飯漿極酸者亦得空用之下白米粉大如酸枣粉多則白以淨竹箸不膩者良久痛撓蓋冒至夜瀉去上清汁至淳處止傾著白練角袋子中懸之明日乾浥、時捻作小瓣如半麻子陰乾之則成矣合香澤法如清酒以侵香夏用冷酒春秋溫酒令暖冬則小熟鷄舌香俗人以其似丁子故為丁子香也藿香首宿澤蘭香凡四種以新絲裏而浸之夏一宿春秋再宿冬三宿用胡麻油兩分猪腹一分內銅鐺中即以浸香酒和之前煎數沸後便緩火微煎然後下所浸香煎緩火至暮水尽沸定

乃以火頭內澤中作聲者水未尽有烟出無聲者水尽也
澤欲熟時下少許青蒿以發色以絲罍鐺甯瓶口瀉著瓶
中合面脂法用牛髓牛髓少者用牛脂和之若無髓空用
脂亦得也溫酒浸丁香藿香二種浸法如煎澤法煎法一
同合澤亦著青蒿以發色絲濾著瓷漆盞中令疑若作膏
脂者以熟米和之青油裏之其冒霜雪遠行者常齧蒜令
破以揩唇既不劈裂又令辟惡小兒面患皴者夜燒梨令
熟以糠湯洗面訖一暖梨塗之令不皴赤蓬染布爵以塗
面亦不皴也合手藥法取豬胆一具摘去其脂合蒿葉於
好酒中痛按使汁甚滑白桃人二七枚去黃皮研碎酒解

取其汁以綿裹丁香藿香甘松香橘核十顆打碎著膽汁中仍浸置勿出瓷貯之夜煮細糠湯淨洗面拭乾以藥塗之令手軟滑冬不皴作紫粉法用白米英粉三分胡粉一分不著胡粉不著人面和合均調取落葵子熟蒸生布絞汁和粉日曝令乾若色淺者更蒸取汁重染如前法作米粉法染米第一粟米第二如用一色純米勿使有雜物使甚細簡去碎者各自純作莫雜餘種其雜米糯米小麥黍米稌米作者不得好也於水槽中下水脚蹋十徧淨淘水清乃止大瓮中多著冷水以浸米春秋則一月夏則二十日冬則六十日唯多日佳不須易水臭爛乃佳日若淺者

粉不滑美日滿更汲新水就瓮中沃之以手把攪淘去醋
氣多与徧數氣尽乃止稍出著一砂盆中熟研以水沃
撓之接取白汁絹袋濾著別瓮中麤沉者更研水沃接取
如初研尽以杷子就瓮中良久痛杼然後澄之接去清水
貯出滓汁著大盆中以杖一向撓勿左右迴轉三百餘匝
停置盖瓮勿令塵汚良久清澄以杓徐接去清以三重
布帖粉上以粟糠著布上糠上安灰濕更以乾者易之
灰不復濕乃止然後削去四畔麤白無光潤者別收之以
供麤用麤粉皮所成故無光潤其中心圓如鉢形酷似鴨
子白光潤者名曰粉英粉米心所成是以光潤也無風

塵好日時舒布於床上刀削粉英如梳曝之乃至粉乾足
將仕反手痛按勿住痛按則滑美不按則澁惡擬人客作
餅及作香粉以供粧摩身体作香粉法唯多着丁香於粉
合中自然芬馥亦有搗香末絹篩和粉者亦有水浸香以
香汁浸粉者皆損色又費香不如全署合中也齊民要術
紅藍亦曰黃藍草木畧

八月中鋤成行壠春穴下種或灰或鷄糞蓋之灌澆不宜
濃糞次年花開侵晨採摘微搗去黃汁用青蒿蓋一宿捻
成薄餅晒乾收用勿近濕牆壁去處便民畧纂

二月種紅花種時欲雨或漫撒或耨耩如種麻法至五月

収子便種晚花秋間八月種亦得臘月亦可

五月収紅花侵晨採花微搗細去黃汁用青蒿蓋覆一宿

捻成薄餅子晒乾収之勿近濕牆壁則浥損同上

紅花一名黃藍葉頗似藍故有藍名生於西域張騫所得

今處有之花地欲得良熟二月末三月初種也一種法

欲雨後速下或漫撒種或耨下一如種麻法亦有鋤耨而

掩種者子科大而易料理花出日乘涼摘取則不摘必

湏盡即留餘五月子熟拔曝令乾打取之子亦不五月種晚

花春初即留子入五月便種也七月中摘深色鮮明耐久

不黧紆物反勝春種者収子与麻子同價既任車脂亦堪

為燭一頃花日須百人摘以一家手力十不克一但駕車
地頭每旦當有僮女小女十百為群自來分摘正須平量
中半分取是以單夫隻妻亦得多種。晒紅花法摘取即
碓搗使熟以水淘布袋絞去黃汁更搗以粟飯漿清而醋
者淘之又以布袋絞去汁即收取染紅勿棄也絞訖看毫
器中以布蓋上鷄鳴更搗令均於席上攤而暴乾勝作餅
花作餅
者不得乾令
花泥爛也以染真紅及作臘脂其利殊博也 王氏農書

燕支葉似蒴花似蒲公出西方土人以染名為燕支中國
人謂之紅藍以染粉為面色謂為燕支粉今人以重絳為
燕支非燕支花所染也燕支花所染自為紅藍尔旧謂赤

白之間為紅即今所謂紅藍也

古今注

燕支本非中國所有蓋出西方染粉為婦人色謂燕支粉
習鑿齒與侍中書曰此有紅藍北人採取其花作烟支婦
人粧時作頰色用如豆許按令徧頰殊靚鮮明匈奴名妻
閼氏言可愛如烟支也故匈奴有烟支山西河旧事歌曰
失我初連山使我六畜不繁息失我閼氏山使我婦女無
顏色今中國謂之紅藍或只謂之紅花大抵三月初種花
出時日：乘涼摘取之頃一日須百人摘五月種晚花七
月中摘深色鮮明耐久不黧勝於春種者花生時但作黃
色茸：然故又一名黃藍杵碓水掬絞去黃汁更搗以清

釀粟漿淘之絞如初即收取染紅然後更撈而暴之以染
紅色極鮮明按崔豹所言則漢雖有紅藍然不可以為烟
支其染亦未盛今則盛種而多一謂之真紅賽蘇方木所
染崔豹古今注曰今人以重絳為烟支非燕支花所染也
燕支花自為紅藍尔旧謂赤白之間為紅即今所謂紅藍
也其謂之舊紅者即漢重絳顏色黯暗相去遠矣又為婦
人粧色以絲染之圓徑三寸許號絲燕支又小薄為花片
名今花烟支特宜粧色蓋種一項者歲收絹三百疋此千
畝危菑之類博物志曰黃藍張騫所得尔雅翼

紅花本草名紅藍花用以染絳子亦可壓油八閩通志

燕脂蓋起自紂以紅藍花汁凝作燕脂以燕國所生故曰
燕脂塗之作桃紅粧馬編古今注

山花叢生端州山嶺間多有之其葉類藍其花似蓼正月
開花土人採含苞者賣之用為燕脂粉或時染帛其紅不
下紅藍又鄭公虔云石榴花堪作燕脂北戶錄

園經曰紅藍花即紅花也生梁漢及西域今處有之人
家塲園所種冬而布之於熟地至春生苗夏乃有花下作
棊彙多刺花藥出棊上園人承露採之採已復出至盡而
罷棊中結實白顆如小豆大其花暴乾以染真紅及作燕
脂主產後血病為勝其實亦同葉頗似藍故有藍名又名

黃藍博物志云張騫所得也

燕脂今或書作烟支又作燕支烟脂然各有所拠中華古今注燕脂蓋起自紂以紅藍花凝作之以其燕所生故曰燕脂蘇氏演義曰燕支葉似薊花似蒲出西方土人以染名為燕支中國亦自為紅藍以染粉為婦人色謂為燕支粉北戶錄載習鑿齒書云此有紅藍北人採取其花作烟支婦人粧時作頰色殊蒼鮮明匈奴名妻作閼支言可愛如烟支也 雲谷雜記

種紅花種欵雨漫撒耙勻如種麻法至五月収子便種晚花秋間八月及臘月皆可種水雲錄

虎杖

爾雅曰葑虎杖註似紅草而龐大有細刺可以染赤疏葑
一名虎杖陶注本草云田野甚多狀如大馬蓼莖班而葉
圓是也

鼠尾草

圖經曰鼠尾草旧不載所出州土云生平澤中今所在有之惟點中人採為藥苗如蒿夏生莖端作四五穗：若車前花有赤白二色尔雅謂莖鼠尾云可以染皂草也四月採葉七月採花陰乾古治痢多用之姚氏濃煮汁如薄飴飲五合日三赤下用赤花白下用白花差

鼠尾草曰勤曰陵翹曰烏草曰水青可以染皂尔雅勤鼠尾草木畧

尔雅曰勤鼠尾注可以染皂疏可以染皂草也一名勤一名鼠尾本草有白華者有赤華者又一名陵翹陶注云田

野甚多人採作滋染阜草是也

葦草

葦草味苦平無毒主久欬止氣喘逆久寒驚悸痂疥白禿
瘍氣殺皮膚小蟲可以染黃作金色生青衣川谷九月十
月採唐本注云此草葉似竹而細薄莖赤圓小生平澤溪
澗之側荆襄人煮以染黃色極鮮好洗瘡有効俗名葦葦
草尔雅云所謂王芻者也臣禹錫謹按尔雅疏云葦鹿葦
也今呼鷓鴣脚莎詩衛風云瞻彼淇水葦竹猗猗是也

葦草曰葦葦曰王芻曰鷓鴣脚莎尔雅曰葦王芻又曰竹草
木畧

葦染草也今但知為忠葦之葦丹鉛摠錄

通草

離南活菟今通脫木也山海經名冠脫生山側高大許葉如草麻花上有粉莖中有瓢輕白可愛女工取以飾物按此物為飾不知起自何世漢王符固已訛花采之費至梁宗懔記荆楚之俗四月八日有染絹為芙蓉捻臘為菱藕亦未有稱此物者今通行於世矣亦用蜜藏食之今俗謂之通草按通草作藤蔓大如指其莖幹大者徑三寸每節有二三枝頭出五葉夏秋開紫花或白花。結實如小木瓜核白瓢黑食之甘美南人謂之燕覆亦云烏覆非此類也

尔雅翼

圖經曰通草生石城山谷及山陽今澤潞漢中江淮湖南
州郡亦有之生作藤蔓大如指其莖幹大者徑三寸每節
有二三枝、頭出五葉頗類石韋又似芍藥三葉相對夏
秋開紫花亦有白花者結實如小木瓜核黑瓢白食之其
美南人謂之鸞覆亦云烏覆正月二月採枝陰乾用或以
為葡萄苗非也今人謂之木通而俗間所謂通草乃通脫
木也此木生山側葉如單麻心空中有瓢輕白可愛女工
取以飾物爾雅云離南活菈音脫釋云離南草也一名活
菈山海經又名完脫生江南高丈許大葉似荷而肥莖中
有瓢正白者是也又名倚商主蠱毒其花上粉主諸蟲癰

惡瘡痔疾取粉內瘡中正元廣利方療瘰癧及李絳兵部
療骨伏氣攻因不散方中並用之今京師園圃間亦有種
蒔者又按張氏燕吳行後記揚州大儀甘泉東院兩廊前
有通草其形如椿少葉子垂稍際如苦楝與今所殊別不
知是木通邪通脫耶或別是一種也古方所用通草皆今
之木通、脫稀有使者近世醫家多用利小便南人或以
蜜煎作果食之甚美蕪解諸藥毒

通脫木如蟬麻生山側花上粉主治惡瘡心空中有熱輕
白可愛女工取以飭物酉陽雜俎

考本草通草與俗所謂通草不同本草通草乃木通也蔓

生結實如小木瓜可食味甘平無毒主通九竅關節令人
不忘俗所謂通草乃通脫木也本地有之陳藏器云通脫
木葉似草麻心中有瓢輕白可愛女工取以飾物其花上
粉主諸虫瘡野鷄病取粉納瘡中愈吳化府志

通草曰附支曰丁翁曰王翁萬年方書亦謂之木通尔雅
曰離南活菟以活菟亦謂之離南今人謂之通草其瓢白
可愛婦人取以為首飾其實曰燕覆子曰烏覆曰桴椌子
曰桴子草木畧

尔雅曰離南活菟音註草生江南高丈許大葉莖中有瓢
正白零陵人祖日貫之為樹疏離南草也一名活菟山海

經又名冠脫祖且也貫事也言零陵郡人且日事之使科
大若樹然也

蓆草

甬東里多種蓆草民以織蓆為業著四方曰明蓆

四明郡志

蓆草冬月種小暑後刈姑蘇志

小暑後斫起晒乾以備織蓆留老根在田壅培廢苗至九月間鋤起擘去老根將苗去梢分栽如插稻法用河泥與糞培壅清明穀雨時復用糞或豆餅壅之即耘草立梅後不可壅若灰壅之則生虫退色便民圖纂

龍鬚草旧傳出自縉雲鼎湖黃帝乘龍仙去群臣拔龍鬚鬚墜化而為草晉時織為蓆歲貢御座用今處有之惟蘇州虎丘為盛種者如藝稻織蓆通四方温州者次之產

雁山者莖細而秀

雁山志

燈心草

燈心草味甘寒無毒根及苗主五淋生煮服之生江南澤地叢生莖圓細而長直人將為席敗席煮服之更良

衍義曰燈心草陝西亦有蒸熟乾則折取中心穰然燈者是謂之熟草又有不蒸但生乾剥取者為生草入藥宜用生草

燈心草種下湿地葉如蔥管細尖而長其中熟白剔出之以點灯其草可織為席亦可入藥

具化府志

燈草種法与蓆草同最宜肥田瘦則草細五月刈曝乾以刀割開其心作灯炷皮製雨簑姑蘇志

燈心叢生澤地莖圓細而長直亦可為席八閩通志

水葱

水葱生水中如葱而中空又名翠管王維詩水驚波兮翠管靡星也此草可為席唐六典東牟郡歲貢水葱席冊鉛疑即今一夫葱也生水中有葱之形而無葱之味蓋草類耳

水葱席出萊州登亦有之水葱草也中虛似食葱而長硬生水濱山東通志

管 音莖

管有二種有野管有溪管 吳化府志

管草生沙塗上似蘭用織席捆屨 姑蘇志

爾雅曰白華野管傳曰已漚為管未霑人功故謂之野管
管茅屬也而其華白故一曰白華詩曰白華管兮白茅束
兮又曰英：白雲露彼管茅逸詩曰雖有姬姜無棄憔悴
雖有絲枲無棄管蒯 埤雅

爾雅曰白華野管註管茅屬詩曰白華管兮疏舍人云白
華一名野管陸机云管似茅而滑澤無毛根下五寸中有
白粉者柔韌宜為索漚乃尤善矣郭云管茅屬此白華亦

是茅之類也漚之柔韌異其名謂之為管因謂在野未漚者為野管耳

毛詩疏曰白華箋云人割白華於野已漚之名之為管然則管者已漚之名未漚則但名為茅也

莞音官

爾雅曰莞苻離其上蒿音蒿註今西方人呼蒲為莞蒲蒿謂其頭臺首也今江東謂之苻離西方亦名蒲中莖為蒿用之為席某氏曰本草云白蒲一名苻離楚謂之莞蒲其上臺別白蒿詩小雅斯于云下莞上簞鄭箋云莞小蒲也以莞蒲一草之名而司几筵有莞筵蒲則有大小之異為席有精有粗故得為兩種席也

此莞疑即今人織為蒲包者也

爾雅悌雅

藟

尔雅曰藟萬董註似蒲而細疏藟一名萬董狀似蒲而細
可為簞亦可為絢以為索

藟
魯

尔雅曰藟藟切古註作履苴草疏藟說文云藟草也可以
束一名蘆即蒯類也中作履底字苑云藟苴履底故云作
履苴草也

葦荻附

葦爾雅云葦葭蘆葦也荻一名蘆說文云蘆荻也葦四月
苗高尺許選好家葦連根栽成土墩如碗口大於下湿地
內掘區栽之縱橫相去一二尺欲疾得力則密栽至冬放火燒過

次年春芽出便成好葦十月後刈之一法二月熟耕地作
壟取根臥栽以土覆之次年成葦。又壓栽法其葦長時
掘地成渠將莖祛倒以土壓之露其梢凡葉向上者亦植
令出土下便生根上便成筍與壓桑無異五年之後根交
當隔一尺許斫一鑿即滋旺矣荻栽與葦同呂氏春秋曰
季秋之月命虞人材葦供國郭璞傳云不宜焚荻地理云

名山大川不封蓋欲與民同利也以是觀之葦菰雖微物亦可以供國利民如此

王氏禮書

蘆或謂之葭小者曰荻八閩通志

蘆生江浦中大而虛中謂之蘆細而實中謂之荻其笋初生時亦可食尔雅其萌蘆注今江東呼蘆筍為蘆音繼鎮江府志

葦尔雅曰葦醜方言其華皆有芳秀今風輒吹揚如雪其聚於地如絮也淮南子曰蒹葭類絮而不可以為絮葦即今之蘆一名葭葦之未秀者也荻一名華兼一名蘆高數尺今人以為蘆荻之未秀者也葭一名華兼一名蘆高數尺今人以為蘆

箔因此為名也至秋堅成謂之萑葦詩曰八月萑葦莊子
曰欲惡之孽為性萑葦蕙葭始萌以扶吾形尋擢吾性則
明此幼曰兼葭長曰萑葦矣先儒以為萑如葦而細按礼
曰土鼓蕢桴葦籥伊初氏之樂也葦管中簫則萑小而葦
大矣是故謂之偉其字从常則葦緩故也旧云蘆灰缺而
月暈移說者以為取蘆草灰随牖下月光中令圓畫缺其
一面則月暈亦缺於上也詩曰兼葭蒼蒼白露為霜埤雅
廣雅云萑荻也荻之初生曰莢兼其未秀者也說文曰萑
之初生一曰亂一曰騅按釋言曰莢騅也莢亂也則萑之
初生一曰亂一曰騅是矣詩曰葭莢揭々又曰毵衣如莢

傳曰茭騅也蘆之初生蘆黑也騅在青黑之間今按郭璞
注以爲蘆似萑而細者又曰似萑而小實中爲茭則蘆茭
又蘆之一種也蓋蘆萑之小者茭萑之小者故其醜似萑
而細欤如萑而小者亦或謂之蘆茭爾雅曰蘆萑茶森蘆
芳萑茗謂之茶萑茗謂之芳詩曰予所捋荼傳曰荼萑茗
也字說曰蘆謂之葭其小曰萑葭謂之蘆其小曰萑其始
生曰茭又謂之葭葭強而葭弱葭高而葭下故謂之葭茭
中赤始生未黑：色而赤故謂之茭其根旁行牽掣槃互
其行無辨矣而又強爲故謂之葭同上

蘆織席在處有之吾海濱人謂蘆葦自六朝已有此語從

草從廢名見劉敞傳鄉人謂織席時蘆每飛起故飛聲轉而為廢亦方言也

陸深續
停錄

蘆葦一名萑葦大者曰蘆小者曰葦九江府志

園經曰蘆根旧不載所出州土今在処有之生下濕陂澤中其狀都似竹而葉抱莖生無枝花白作穗若茅花根亦若竹根而節疎二月八月採日乾用之當極取小底其辛者其露出其浮水中者並不堪用謹按尔雅謂蘆根為葦華郭璞云蘆葦也葦即蘆之成者謂蘆為蘆与蘆同蘆似萑而細長高數尺江東人呼為蘆適与荻同者談莢為葦葦似葦而小中實江東呼為烏蘆者或謂之荻至秋堅

成即謂之蔞其華皆名茗其萌笋皆名蘗若然所謂蘗蔞
通一物也所謂蘗今作薰者是也所謂蔞人以當薪爇者
是也今人罕能別蘗蔞與蘗蔞又北人以蔞與蘗為二物
水傍下濕所生者皆名蔞其細不及指人家池園所植者
為蘗其幹差大深碧色者謂之碧蘗亦难得然則本草所
用蘗今北地謂蔞者皆可通用也其笋味小苦堪食法如
竹笋但極冷耳

蘗即今苦蘗也其笋最苦小兒頭生癬剃髮後用此擦之
愈宋志云或謂之蔞其小曰蘗、與荻同 興化府志

蘗蔞爾雅云名蔞華蔞名蔞蔞小如蔞而實者為蔞亂其

也葦蘆也連文言之明非一物又詩釋文云葦江東人呼之為鳥蘆今吳中鳥蘆草乃荻屬也則葦葦為荻明矣然召南彼茁者葦謂之初生可也秦風曰蒹葭蒼蒼白露為霜則散文言之霜降之時亦得謂之葦不必初生若對文須分大小之名耳荻芽似竹筍味甘脆可食莖脆可曲如釣作馬鞭節花嫩時紫脆則白如散絲華色重狹長而白脊一類小可用為曲薄其餘惟堪供爨耳蘆芽味稍甜作蔬尤美莖直花穗生如狐尾褐色葉濶大而色淺此堪作障席筐筥織壁覆屋絞繩雜用以其柔輒且直故也今藥中所用蘆葦子葦葉以此證之蘆葦乃是一物皆當用蘆

無用荻理 續夢溪筆談

點蒼董生西羽問予晉謠云官家養蘆花成荻蘆與荻亦有分乎予因集古訓詁以荅之說文云葦之未秀者曰蘆徐鉉曰未秀言尚小也又曰葦之未秀者曰葦又曰荻荻也古篆作道淮南子作藹易說卦荻葦註藹也今文作荻又曰葦大葦也爾雅葦醜芳言其華皆有芳秀遇風則吹揚如雪其聚地如絮詩行葦注葦初生名葦稍大為蘆長成乃名為葦說文解荻字云荻之初生一曰亂一曰騅草色如騅在青白之間詩大車荻騅也八月荻葦註初生為荻長大為亂成則名荻又名騅一物四名郭云荻似葦

而小又云蒹似荏而細是蒹小於荏、小於荑字說曰蘆
謂之葭其小曰荏荏謂之蒹其小曰葦其始生白曰荑又
謂之葍荏強而葭弱荏高而葭下荑中赤始生未黑、已
而赤故曰荑其根旁行牽掣盤互故曰葍陳承之本草圖
經曰蘆葦也葦即蘆之成者蒹似荏而細長江東人呼為
蒹適者謂荑為葍似葦而小中實江東人呼為烏蘆者或
謂之葍至葍而成即謂之荏其花皆名荏其萌芽皆名蘆
若然所謂蘆葦通一物也所謂蒹今作蒹者是也所謂荑
人以當薪爰者也今人罕能別蒹荑與蘆葦又北人以葦
與蘆為二物水傍下濕所生者為葦其細不及指人家池

圓間所植者為蘆其幹差大深碧色者謂之碧蘆亦難得
丹鉛摠錄

烏蘆音爾雅曰蒹葭也郭璞云似葦而小實中江東呼為
烏蘆詩曰蒹葭揭々毛云蒹蘆蒹葭義疏云葭或謂之荻
至秋堅成即刈謂之蘆三月中生初生其心挺出其下本
大如箸上銳而細有黃黑勃著之汗人手把取正白噉之
甜脆一名蘆蕩揚州謂之馬尾故爾雅云蘆蕩馬尾也幽
人謂之旨草齊民要術

信都芳少明筭術祖珽謂芳曰律管吹灰術甚微妙絕未
既久吾思所不至卿試思之芳遂留意十數日便云得之

然終須河內葭莩灰後得河內葭莩其術應節便飛餘灰
即不動也不為時所重竟不行此法遂絕北齊書

尔雅曰葦醜芳莠葦即蘆之成者其類皆有芳秀也葭華
註即今蘆也葦蘆註似葦而細高數尺江東呼為蘆葭蘆
註葦也葭亂註似葦而小實中江東呼為烏蘆其萌蘆註
今江東呼蘆荀為蘆然則葦葦之類其初生者皆名蘆疏
此亦蘆葭等生成之異名也葭一名華即今蘆也葦之未
成者蘆一名蘆詩秦風云蘆葭蒼々陸机云蘆水草也堅
實牛食令牛肥彊青徐人謂之蘆兗州遼東通語也葭一
名蘆葭一名葭李巡曰分別葦類之異名如李巡云蘆葭

共為一草如郭云則蘆葍別草案詩大車傳云蒺藜也蘆
之初生則毛意亦以蒺藜為一草也按詩衛風碩人云蒺
藜揭陸机云葍謂之蒺至秋堅成則謂之蒺其初生三
月中其心挺出其下本大如箸上銳而細楊州人謂之馬
尾以今語驗之則蘆葍別草也其萌名蒺注音繾綣者大
雅勞民云以謹繾綣左傳云繾綣從公無通外內此取蒺
与繾字音同不為蒺也

毛詩豳風十月云八月蒺藜傳蒺為蒺藜為蒺藜蓄蒺藜
可以為曲也疏正義曰釋草云蒺藜樊光云蒺初生蔥駢
色海濱曰葍郭璞云似蒺而小又云蒺藜舍人曰蒺一名

華樊光引詩云彼茁者葭郭璞云即今蘆也又云葭蘆郭璞曰葦也然則二草初生者為葭長大為蘆成則名為葦小大之異名故云蘆為葦葭為葦此對文耳散則通矣兼葭云白露為霜之時猶名葭行葦云敦彼行葦夏時已名葦也

茗帚即獨掃

茗帚二月屋側路旁皆可種嫩芽可做菜食以草繩要束九月間刈取以石壓匾收之三月亦可種農桑撮要

茗帚本礼檀弓君臨臣喪以巫祝桃茢執戈惡之也鄭康成云為有凶邪之氣枉側桃鬼所惡茢萑可埽不祥君臨臣喪有此法左傳魯襄公在楚：人使公親襚乃使巫以桃茢先被殯杜預註云茢荼穰也孔穎達曰茢是帚蓋挑為棒也毛詩傳曰葍為萑：茗謂葍穗也杜預所謂茢荼穰者今世所謂茗帚者或用葍穗或用荼穰是二者皆得為之也

能改三漫錄

獨掃尔雅曰馬帚注云可以為帚篲八閩通志

獨帚今地掃也宋志謂一株可以成帚故曰獨帚又引尔雅曰馬帚按尔雅云箭王彗注謂其樹似藜可以為帚篲又云彗馬帚疏謂草似著者可以為帚篲然以今觀之獨帚於藜為近疑是箭王帚也 吳化府志

尔雅曰箭王彗註曰王帚也似藜其樹可以為掃彗江東呼之為落帚

尔雅曰彗馬帚註似著可以為掃彗

尔雅曰彗藟藟註藟藟亦似藜疏此亦似藜而葉大者名彗一名藟藟莊子曰藟藟拄字是也